

Date – 16/07/2025

Time - 7:30 -7:40Hrs

AKASHVANI AIZAWL

REGIONAL NEWS BULLETIN

HEADLINES (MORNING)

- **Tun thla July thla atanga Territorial Army a tang tur te lakluh tura ruahman chu chhan hrang hrang vangin kumin November thlaah sawn a ni.**
- **Kumin kum chanve chhungin Mizoramah ruihhlo vangin mi 33 an thi tawh a, heroin leh a kaihhnawih avanga thi an tam ber.**
- **External Affairs Minister Dr.S.Jaishankara chuan Shanghai Cooperation Organisation (SCO) mamberte chu an dinchhan bulpuiah chiang thar turin a ngen.**
- **4. Yemena Indian nurse Nimisha Priya-i tihhlum hun wawiina tih chu chu sawn hlat a ni.**



TERRITORIAL ARMY

Mizorama Territorial Army din tura hmalakna kal zelah tun thla July thla atanga Territorial Army a tang tur te lakluh tura ruahman chu chhan hrang hrang vangin kumin November thlaah sawn a ni.

Akashvani Aizawl, Regional News Unit zawhna chhangin, Coordination & Land Search Committee, Chairman, Lt. Col. Clement Lalhmingthanga, MLA chuan ruahman lawk ang chuan Territorial Army a tang tur lakluhna hi June ni 14 atanga tan tur ni mah se, ruahsur nasa leh harsatna dangte avangin July thlaah sawn a ni a, hei pawh hi khawchhia leh thil dang vangte in November thla khian sawn leh a ni a ti.

Tun dinhmunah Lunglei leh Aizawl-ah Indian Army officer pakhat ve ve kaihhruaina hnuaiah company pahni an in bun tawh a, Aizawl a mi chu Assam Rifles hmun hluiah an awm lailawk mek a, hetihlai hian Bungbangla Tourist Lodge building-ah an awm lailawkna tur ruahman sak an ni tih sawiin, PWD leh PHE tiamin Mizoram sorkar department hrang hrang te chu a tul anga thawm tha turin Coordination & Land Search Committee chuan an hriattir tawh a, an tihfel hunah an insawn thla ang a ti a, Lunglei lama mite pawh Assam Rifles hmunah an awm mek tih a sawi a ni.

Lt. Col. Clement-a chuan Territorial Army a tang turte chu ruahman ang chuan November thlaah pilot project angin Mizo hlang 70 lak phawt an ni ang a, a lehpekah a leta tam an la leh dawn a ti a, TA a tang turte lakluh ni tur Chiang Taka ruat a nih vele form lakchhuah hun leh thu pawimawh te advertisement a tihchhuah a ni chauh dawn tih a sawi a ni.

VC

Pu Clement Lalhmingthanga sawi danin, Mizo Territorial Army awmna tur hian thutlukna siam a la ni lova, kumin chhung chuan thutlukna siam hman an tum a ni. Mizorama Territorial Army bul tan nan hian Company pahnih a awm dawn a, company pakhat-ah officer pakhat leh Junior Commissioned Officer, JCO pali, bakah Other range-92, an vaiin mi 102 an awm dawn a, officer dil hun chhung chu June thla khan a tawp tawh a, Mizo tan bik ni lovin ram pum huapa dil theih a ni a, officer 19, hmeichhe pakhat leh mipa 18 lak an ni dawn a ni.



MUHCS

Mizoram Universal Health Care Scheme (MUHCS) hnuaiah mi 16,519 an inziak lut tawh a, inziaklut zingah hian mi 14,460 te chu General (Rs 2500) hnuaia in ziaklut niin, mi 1338 chu Standard (Rs 5000) hnuaia ziah luh an ni a, Private (Rs 10,000) hnuaiah mi 721 an inziak lut tawh bawh a ni.

Sawrkhar chhinchhiah danin, MUHCS hnuaiah hian offline-in 15933 leh online-in 586, an vaiin mi 16519 inziak lut tawh a, MUHCS inziah luh hi kalpui chhunzawm zel niin thla thar August atanga inziak lut duh tan a man let khata tam chawi in a inziah luh theih dawn a, General plan Rs 2500 ni thin chu Rs 5000 ni tawhin Standard (Rs 5000) chu Rs 10000 a ni tawh dawn a, Premium (Rs 10,000) pawh Rs 20,000 a ni tawh dawn a ni.

MUHCS hnuaiah hian Mizorama sorkar damdawi in leh Primary Health Centre (PHC) zawng zawng te an awm bakah, Mizoram chhunga private damdawiin 11, Mizoram chhunga Day Care Centre (Dialysis) 3 leh Mizoram pawna damdawi in 25 te empanelled an ni tawh a ni.

Hetihlai hian, Private damdawiin he scheme zawm duh lo te leh sorkar inbiakna neih a la ni lo a ni.



DRUG RELATED DEATH

Kumin kum chanve chhungin Mizoramah ruihhlo vangin mi 33 an thi tawh a, heroin leh a kaihhnawih avanga thi an tam ber.

Excise & Narcotics Department in a chhinchhiah danin, kumin January thla atanga tun thla July ni 2 thlang khan Mizoramah ruihhlo avangin mi 33 an thi tawh

a, heng zinga mi 28 chu mipa niin, midang 5 chu hmeichhia an ni a, ruihhlo vanga thi te hi thalai kum 19 atanga kum 44 inkar an ni a, an zinga mi 9 te chu Heroin vanga thi an ni a, midang 24 te chu heroin leh ruihhlo dang tihpawlh vanga thi an ni thung a ni.

Heroin leh Proxyvon bakah hian Alprazolam, Cataspa, Corazepam, khuh damdawi tui chi Cough Syrup, Dendrite, Diazepam, Ganja, Nitrosun, Pacitane (pepe), Parvon Spas, Peptica, Respira D, zu, codeine leh damdawi mum dang te an thihpui a ni.

Kan corr report lo ngaithla ang.

Excise & Narcotics Department in Mizorama ruihhlo vanga thi a chhinchhiah tan kum 1984 atanga kumin thlengin Mizoramah ruihhlo vangin mi 1912 an thi tawh a, a zinga mi 1681 te chu mipa niin, 231 te chu hmeichhia an ni a, ruihhlo vanga thi tawh zingah kum 14 mi chu a naupang ber a, kum 58 chu a upa ber thung a ni.

Kum 2004 kha Mizorama ruihhlo vanga thi an tam ber tum niin mi 143, mipa 122 leh hmeichhia 21 an thi a, khatih hunlai khan Proxyvon chu an thihpui tam ber a ni a, kum 2015 chho atangin ruihhlo vanga thi zingah Heroin vanga thi an tam tan a. Kum 2005 hnulamah kum 2023 kha ruihhlo vanga thi an tam leh ber tum niin, mi 76 in ruihhlo vangin nunna an chan a ni.

<><><>

BAL VIVAH MUKT BHARAT

Kumtlinglo nupui-pasal neih khapna dan Prohibition of Child Marriage Act, 2006 (PCMA) chungchanga hmalakna thlrin Directorate of Women & Child Development chuan nimin khan thutkhawm a huaihawt a,

He programme hi Supreme Court thutluknaa state tinte an dinhmun mil a kum tlinglo inneihna nuaibo tura hma la tura a hriattirna bawhzuina a ni.

He hun, Social Welfare, Tribal Affairs, Women & Child Development Department Secretary,Pi Lalzarmawii’n kaihhruaiah hian department hrang hrangte thawhhona tihchak leh khawtlang hruaitute, police leh zirna in hrang hrangte nena thawhhona tha neih a pawimawh thu sawi a ni a. Agenda-ah hian dan kengkawhtu leh judicial officer-te tan training buatsaih te, Special Juvenile Police Unit (SJPU) integration chungchang te, school textbook-a PCMA chungchang telh te, PCMA inhrilhhriatna, inkaihhruai leh zirtirna pe thei turin zirtirtu hmeichhia ruat te, leadership programe tleirawl hmeichhiate tana buatsaih te leh naupang, child marriage dinhmun a ding palh theite puih chungchangte sawiho a ni.

<><><>

SAMVIDHAN HATYA DIWAS

India ram danpui palzut ni champhaphak, Samvidhaan Hatya Diwas pualin nimin khan Siaha ah leh Hnahthial District ah Exhibition buatsaih a ni.

Sawrkhar laipui Ministry of Culture in June Ni 25 chu Samvidhan Hatya Diwas (Ram danpui palzut ni) atana a lo puan tawh behchhanin District pahnihah hian hun hman a ni a, Siaha District ah chuan hmun 4 ah exhibition neih tura ruahman niin July ni 11 khan DRDO conferenc Hall ah exhibition buatsaih alo ni tawh a, Vawiinah BDO office Complex ah hun hman niin July ni 18 hian Art and Culture Department, MADC in a buatsaih veleh anga, a tawpna ber hi Tipa ah neih tura ruahman a ni.

Exhibition ah hian India ram zalenna sualtute sulhnu thenkhat bakah Kum 1975 National emergency puan a nih lai chanchin te phochhuah a ni a, heng bakah hian Democracy Rama Danpui (Constitution) pawimawhna video tawi phochhuah nghal a ni. Zirlai naupangte bakah mipui tam takin he exhibition hi chhimin signature board a tar ah an hming an ziak theuh bawk a ni.

Hnahthial ah chuan DC Conference Hall-ah Bawrhsap, Pi K.Vanlalruati hova hun hman a ni a, Bawrhsap chuan kum 1975-a National Emergency puan a nih champha hriat reng nan mai mi lovin Indian Danpui hman sual a nih dan leh hman sual a nih tawh loh nana mipuite kan inralrin reng theihna tur atana he hun hi buatsaih a nih thu a tarlang a. Mipuite, a bikin mi retheite zalenna leh dikna chanvo rah behna rapthlak tak thlengin India ram zalenna a neih hnu a hun thim ber, tih hiala sawi a lo ni ta a ni" tiin he hun hman a tul chhan a sawi a ni.

Samvidhan Hatya Diwas hi Kum 1975 June ni 25 ah India ram Prime Minister Pi Indira Gandhi in Article 352 hnuaia Emergency a puan champha hriatrengna puala hun hman a ni a, kumin hi a kum 50-na cham a nih angin Sawrkhar laipui chuan hetiangah hmang tur hian ruahmanna siamin mipuite dikna chanvo inzirtirhar lehna leh Democracy ram tana Danpui (Constitution) a pawimawh thu inzirtirna hun puala buatsaih a ni.

<><><>

AIR NEWS ON SOCIAL MEDIA

Chanchinthar hi Akashvani Aizawl atanga puan a ni a. AIR News Aizawl Youtube Channel, All India Radio News Aizawl Facebook page leh newsonair.gov.in ah te chanchinthar hi ngaihthlak leh chhiar theih a dah a ni.

Vawiin chawhnu dar 2 leh a chanve-ah Chanchinthar puan leh a ni ang.

<><><>

E A M

External Affairs Minister Dr.S.Jaishankara chuan Shanghai Cooperation Organisation (SCO) membrete chu an dinchhan bulpuiah Chiang thar turin a ngen. Nimina SCO Council of Foreign Ministers inhmuhkhawm, Tianjin, China-a neihah Pu Jaishankara chuan firfiakna

chetna chungchangahte, inthenhranna leh helna chungchangahte ngaihdan nget tak an neih a ngai tih a sawi a. Pahalgam-a firfiakte chetna chungchang sawilangin Union Minister chuan Jammu and Kashmir-a tourism lama sum lakluhna tih thuanawp tum rana he inbeihna hi thleng anih thu sawiin sakhuaa inthenhranna siam an tum bawk a ti a. UN Security Council pawhin he thil thleng hi na taka demin he pawikhawihnaa mawhphurtu zawng zawngte chungah hremna pek ngei a duh tih a sawi a ni.

Dr,Jaishankara chuan SCO te thawhhonaah sumdawnna, sum peipunna leh pawisa inthleng kualnaah tun aia chak zawka kal a tul thu sawiin International North South Transport Corridor tih changtlun a tul thu a sawi bawk a ni.

Nimin vek khan External Affairs Minister Dr.S.Jaishankar Beijing-ah China President Xi Jinping a kawm bawk a. He hunah hain Shanghai Cooperation Organisation (SCO) membrete pawh an tel. Dr.Jaishankara chuan Chinese President hi India leh China inlaichinna kawnga hmasawna hrang hrangte a hrilhfiah a. President Droupadi Murmu leh Prime Minister Narendra Modia te aiawhin chibai a buk nghal a ni.

<><><>

YEMEN

Yemena Indian nurse Nimisha Priya-i tihhlum tur vawiina tih chu chu sawn hlat a ni. Thudawn danin sawrkar chuan tunhnaiah Nimisha Priya chungchangah hian theihtawpa hma lain amah khingtu chhungte nen inremna an neih theih nan tan a la a. A thubuai ngaihtuah anih tirh atangin sawrkar chuan theihtawp chhuahin a pui a ni.

<><><>

AXIOM-4

Axiom-4 mission-a International Space Station ah ni 18 an cham hnuin Indian Astronaut Group Captain Shubhanshu Shukla leh a thawhpui mi pathumte nimin chawhnu khan tluang takin lei ah an lo let. Shubhanshu Sukla te hi US-a Pacific tuifinriat kam California-a San Diego-ah an lo tum a ni.

President Droupadi Murmu leh Prime Minister Narendra Modia te chuan dam taka astronaut Shubhanshu Shukla alo let leh thei chu lawmawm an tih thu sawiin ramchhung mipuite nen hlim takin an lo hmuak an ti a. PM Modia chuan India mi zinga International Space Station tlawh hmasa ber anihna chuan mi tam tak a ti phurin beiseina a siam sak ngei dawn tih a sawi a ni.

<><><>